



**PARLAMENTO  
NACIONAL**  
República Democrática de Timor-Leste  
**GABINETE DO PRESIDENTE**

---

DISKURSU SUA EXSELÊNCIA SENHOR PREZIDENTE PARLAMENTU NASIONAL

Dr. Aniceto Longuinhos Guterres Lopes

Iha okaziaun posse ba Membro Konsellu Imprensa no Prezidenti Konsellu Imprensa

Excelências,

Senhores Membros da Meja Parlamento Nacional,

Chefes Bancadas Parlamentares,

Chefe Comissão A Parlmento Nacional,

Senhora Provedora Direitos Humanos e Justiça,

Senhor Ministro dos Assuntos Parlamentares e Comunicação Social,

Senhor Secretário do Estado da Comunicação Social,

Senhores Presidenti RTTL Ep, Presidenti Associação dos Jornalistas de Timor-Leste no  
Presidenti Timor-Leste Press Union,

Senhor Diretor Executivo Conselho Imprensa,

Senhores Diretores Orgaun Komunikasaun sira

Senhoras e Senhores Convidados,

Ba dala uluk hau hakarak hatoo hau nia parabens ba membros foun no prezidenti re-eleitu Konsellu Imprensa nian no ba entidades proponentes kandidatus sira. Informasaun no komunikasaun nudar elementu esensial iha ema nia moris nebe constitui Direitu fundamental ida ba vida humana no vida sosial. Asuntu rua ne'e merese hetan atensaun ho abordagein estruturante husi perspetiva politika, enkuadramentu legal no institucional nebe hatudu ona iha Konstituisaun (artigos 40 no 41), iha Politika Nasional Komunikasaun Sosial (Res.nu.21/2010, 31 marsu), no iha Lei Komunikasaun Sosial (Lei nu.5/2014, 19 novembro) nebe loke dalan ba hamoris Konsellu Imprensa (KI) ho Dekretu Lei nu.25/2015, 5 agostu.

Ohin, nudar Prezidenti Parlamentu Nasional, tuir lei haruka, hau fo pose ba membros husi Konsellu Imprensa, orgaun importante ida iha mundu Komunikasaun, liu-liu iha Komunikasaun Sosial nebe indispensavel ba vida humana no vida sosial iha konstrusaun no rekonstrusaun Timor-Leste nudar Estado de Direito Democratico.

Direitu atu hatoo no hetan informasaun liu husi meios Komunikasaun Sosial ezigi kondisaun lobuk ida inklui liberdade, independensia, profesionalismu, normas reguladora no responsabilidade etika.

Konsellu Imprensa moris iha kompleksidade ida ne'e no aumenta tan ho dinamika vida sosial politika, ekonomika, progresu teknologia informatika nebe lao lais tebes. Iha ambienti ida ne'e, mak KI halo nia funsaun no halo supervizaun ba Orgaun Komunikasaun Sosial sira no ba jornalista sira nebe eizisti no halo sira nia atividades iha Timor-Leste. Kuadrus politiku no legais rekere KI halao nia funsaun sira ho karakter rigorozu, transparenti, independenti, imparcial, profisional, integridade etika, no ho igualdade. KI mos sai fatin ida ba sidadaun sira atu hatoo sira nia preokupasaun kona ba orgaun komunikasaun sosial sira, kona ba jornalista sira ka kona ba sociedade rasik.

KI ezisti tinan lima ona no ohin hau fo posse ba membros eleitos nain lima hodi fo continuidade ba funsionamentu Orgaun ida ne'e. Saida mak normas legais atribui ba Orgauns Komunikasaun Sosial, ba jornalista sira no publiku nia espetativa, tula mos ba itaboot sira nia kabas. Itaboot sira escolhido ba halo funsaun ida nebe todan no nakonu ho desafios iha prosesu konstrusaun no rekonstrusaun sociedade Timor-Leste nebe nebe kompleksu. Ita boot sira ema escolhido husi sidadaun sira no tuir rekizitus Estatuto KI, ema nebe iha idoneidade, hatudu integridade rekonesida, hatudu independensia rekonesida, no iha kompetensia teknika no profisional rekonesida. Membros KI halao misaun todan ida maibe, laos misaun impossivel wainhira bagagein profisional, moral, teknika no administrativa nebe ida-idak iha, tau hamutuk liu husi kolaborasaun, komunikasaun no konsertasaun regular entre membros no pessoal apoio sira hodi hatudu kompetensias husi Orgaun Supervizora ida ne'e.

Ita moris iha sociedade pluralistika, multidimensional nebe nakloke ba mudansas kontínuas. Iha ezigensia kona ba liberdade hatoo no hetan informasaun, liberdade ba imprensa no iha mos ezigensias kona ba komunikasaun responsavel, komunikativu no edukativu, komunikasaun ba paz no estabilidade, ba koezaun no inklusaun sosial no media

komunikasaun nebe kontribui ba konsolidasaun Estado de Direito Democrático no desenvolvimentu sustentavel ba sidadaun hotu-hotu. Liberdade nudar prekondisaun indispensavel iha komunikasaun sosial, maibe dala barak ema ‘kondenadu tanba liberdade ne’e’ (Jean-Paul Satre, 1905 – 1980). Presiza iha norma reguladora hodi halo ekilibriu ba ezigensia hirak ne’e no mantein nafatin profesionalismu no padraun etika nebe as.

Iha situasaun hanesan ne’e, ho ezigensia kona ba profesionalismo no konduta etika jornalista sira, urgenti atu estabese Instituto Formasaun Jornalista hodi kria kondisoens ba jornalista no gestores meios komunikasaun sosial hetan formasaun. Maioria husi Ensinu Superior sira iha Timor-Leste mos seidak loke programa iha area komunikasaun sosial; ita enkoraja mos instituisaun edukativa sira atu tau matan ba necessidade iha setor ida ne’e. KI bele kontribui materia ba dezenvolve kurrikulu formasaun ba jornalista sira.

Parlamentu Nasional iha hau nia mandatu hakarak fo atensaun ba profesionalismu, etika no qualidade materia nebe atu hatoo ba publiku, liu husi kanal nebe Parlamentu iha no liu husi kanal publiku nebe iha ona. Iha tempu badak sei iha espasu ho naran “Uma Komunikasaun” nebe fo fatin ba jornalista sira halo kobertura ba atividades Parlamentu nian no la kleur mos sei ha Programa televizivu nebe uza rede televizaun sira nebe ezisti ona. Parlamentu Nasional nia objetivu estrategiku ida mak *promove kultura abertura no transparencia iha Parlamentu Nasional*, ho programa “Ita nia Parlamentu no Lian-Povo”, nebe presiza kolaborasaun husi orgaun komunikasaun sosial sira, sosiedade sivil no kanal informal seluk nebe conveniente hodi hatutan informasaun ba publiku.

Ho mandatu ida ne’e, KI presiza motiva orgauns komunikasaun sosial sira no jornalista sira atu iha kapasidade diak liu tan ba gere qualidade informasaun, servisu ho profesionalismu, integridade etika ho gestaun no publikasaun nebe kontribui ba promove valores sosial, demokrasia no direitus humanus.

Dala ida tan hau nia parabens, bom trabalho no sucesso ba itaboot sira hotu.

Tenho dito

Obrigado!